

宋

會

要

宋會要

監司提舉郡守轉運提刑使

神宗元豐三年四月二十六日詔監司提舉官有所措置及申請而輒及他司者論如非所職輒主管法哲
宗元祐元年四月十八日三省言奉旨轉運使副提刑
今後選曾任知州以上轉運判官選曾任通判實歷親
民差遣所至有政迹人詔監司許降一等差授如曾任
監司見係通判資序以上亦許差十一月二十四日詔
諸道監司互分州縣每二年巡遍三年五月四日御
史中丞胡宗愈言近者監司不復按舉不法坐視部下
官吏貪恠違越苟簡偷惰廢職務並不督察望明賜
戒敕詔劄與諸路及府界監司仍令御史臺覺察二十

六日詔監司秩滿資深無過人除知州者與理監司資
序五年臣僚言監司便文苟簡多不編行所部詔轉
運提刑司按部二年一周八年十一月五日監察御
史郭知章言竊見比年選授監司多錄寺監丞寺監丞
多以知縣資序蒞事或半年或一年遂除監司今之外
官惟監司為要任所以助朝廷承流宣化繫一路之休
戚其任可謂重矣竊謂宜稍為法以限之除轉運判官
必擇通判資序除提點刑獄必擇知州資序仍各須實
歷一任有治績者然後簡拔用之詔今後監司並依元
祐元年閏三月八日條貫差人如闕人即許降一等差
授是時來之邵亦言祖宗朝除任諸路監司其掄才甚

家所以待遇之體亦甚重故當時詣監司號為得人比
來朝廷除任監司官其掄材甚疎付與甚易寺監丞之
職雖自朝廷掄選然其清濁高下蓋未嘗無間也七寺
丞則異於諸監丞矣宗正太常秘書丞則又異于七寺
丞矣今之寺監丞不問人才能否職任高或一年或二
三年例除諸路監司付與可謂易矣祖宗之制監司或
自內除或自外徙皆受命即行未嘗有所待也元祐初
轉運判官始有待闕既而延及提點刑獄今則轉運副
使亦使之閑居待次遇之之體輕矣此士論所共惜者
也欲望應除監司用祖宗故事候有闕方差其寺監丞
及任滿止可隨材擢用不必人人盡為監司庶幾使者

之體亦稍加重

元祐元年閏二月八日條律未見

月紹聖元年十一月十

五日侍御史翟思言請臣僚任知縣乃得闕陞通判知

州乃得除監司庶幾部使者郡縣得材能吏詔自今初

除轉運判官提舉官須實厯知縣以上親民人提點刑

獄以上須實厯知州或通判人元符元年八月二十

九日左司郎中呂溫卿言諸路監司及州縣各以事格

目做省部分六案詔送詳定一司敕令所徽宗崇寧

元年四月二十六日臣僚上言竊見諸路監司郡守多

務沾長厚之名而苟避刻薄之譖以此奉行職事往往

失當而民被其害國家雖有良法美意而實惠不能及

民者以奉行之人不得其宜也朝廷不可不察乞特賜

誠諭使諸路監司郡守平心悉心守法信義此救弊之
所宜先也詔剏與御史臺常切覺察彈奏二年正月
二十六日中書省言四川地遠軍防不修乞利州夔州
依成都府例各置鈐轄移利州路分于劍門關兵卒增
倍成都府舊以便宜從事罷去已久乞軍民所犯巨蠹
者令酌情處斷四川監司鈐轄大州守臣不差蜀人所
轄兵馬東軍與土人參用如舊法從之四年九月七
日中書省言奉詔除依元豐舊制設置監司外所有後
來增置提舉茶鹽坑冶鑄錢學事保甲糧草官之類可
子細相度可以併省者即行併省不可併省者依舊存
留仍裁減屬官嚴立出巡搔擾及受饋遺約束其經畧

安撫轉運提刑發運糴便提舉司準脩差使勾當公事
官等亦相度裁減無令冗員侵耗那用今依御劄指揮
契勘到監司等見管屬官計五百三十餘員今泰酌措
置欲依下項諸路轉運司屬官一百九員提刑司屬官十員經界
安撫司屬官一百一十三員鈐轄司屬官三十二員總管司屬官七十二員發運
司屬官九員措置河北糴便司屬官六員提舉陝西成都府等路
茶馬司屬官六員欲除帳司檢法官指使外其餘屬官據見
在員數三分中罷一分所減分数不及一員即就釐減
一員止有一員者聽留 五年二月一日手詔四方之
遠視聽豈能周遍慮有民瘼壅于上言可詔逐路監司
察民間疾苦具實以聞六月三日詔曰諸路監司所與

共治而寄制舉耳目之任顧不重哉苟非其人不能檢
身律下乃違法背理貪贓違濫全無忌憚其能制舉一
道稱所任乎朕方勵郡守縣令各各循理而按察之官
身先犯令則士民何所視儆見今諸路監司互相察舉
如法或庇匿不舉以其罪罪之仍令御史臺彈劾以聞
朕當驗實重行黜責故茲詔示想宜知悉內庇匿不舉
以其罪罪之一節仍著為令八月十九日詔訪聞諸路
監司屬官擅行大書付下州縣及出按所部犯分搔擾
可令今後學事司屬官許出諸處點檢學事外餘並不
得離司出詣所部及不得擅移大書付下州縣即有公
事差委勾當者徑詣所差處沿路不許見州縣官及受

續送違者徒三年仍不許赦降去官原減二十九日詔
應監司到所部半年或因赴闕奏事許舉部內所知二
人著為令十二月六日京畿轉運使張杲奏伏見陛下
申畫王畿肇新四輔改提點轉運使職事繁劇舊提點
官兩員請分京畿增置運判一員從之 大觀三年四
月二十二日尚書省送到內降劄子臣僚上言竊見近
者違例條奏之人率多御前或朝廷得知制下推鞠素
該知通監司掌舉按之職但聞舉人之能未見陳按人
之罪復待聖主庶察望有御前及訪聞公事得實若干
件以上按察官司容庇不發量立懲誡之文詔依立法
施行看詳若知而容庇自依律科外今修立下條詣所

部違法監司及知通失按舉

謂自御前及朝廷案
治得寄請理重旨

並奏

裁得旨依擬定仍先次施行

政和元年二月二十四

日詳定一司敕令所狀修立到條諸被受朝旨應委監
司同共管勾或分詣勾當者並于符牒內指定合依某
司所舉某官同共施行從之三月二十九日臣僚上言
契勘法有監司互察之文而提舉學事官例以侵官越
職之故不干預他司事臣以出巡所至有百姓多是稱
訴冤枉臣以職事不相干不敢受理欲望特降睿旨提
舉學事官巡歷遇百姓有詞狀聽詢問情實關送所屬
監司內降黃牒子欲從其請恐好權之人侵越職事宜
深思講究惟使民不失法意為良檢準元符令諸監司

知所部推行法令遲慢若詞訟雖非本職具事因牒所屬監司行遣其命官老病不職而非隸本司準此仍聽具奏詔依申明行下八月二十日臣僚上言恭惟藝祖誕受天命聖神相授專務愛養元元以固邦本謂刺史縣令于民最親尤宜遴擇內則諭輔臣戒飭使保廉節而外則責監司按察俾不得侵漁吾民其或弗按則加之刑罰天聖中工部侍郎李應幾坐守兗州日貪暴不法仁祖出之因謂輔臣曰應幾貪墨何由累至此宰臣王欽若對曰應幾素無廉節然監司未嘗按舉故累資至此于是監司皆罰金以懲之當是時外臺之官莫不悉心舉職而郡縣之吏爭以廉白相尚矣今陛下以聖

德嗣服遴選守宰敦尚廉隅勤恤民隱同符仁祖比肆
赦罷憲司圭田使專一檢察貪吏多取違法害民者以
聞此雖堯舜之用心無以加也臣愚伏願申詔部使者
振舉職業謹察貪吏必以名聞其或坐視侵牟恬不加
意因緣他故暴露失律之罪必罰無赦庶幾仰副遴選
守宰敦尚廉隅勤恤民隱以光昭祖宗之美意從之九
月八日臣僚言朝廷設置監司所以寄四方耳目職在
糾察貪污勸率部屬比來彈治多出臺諫或是朝廷訪
聞或因事冒呈所部監司恬然坐視全無摘發偷安竊
祿辜負使令遂致惠澤弗宣閭閻受弊一歲中部內有
似此違犯之人如及三人以上者

雖不及三人而其
曾爲舉者準此

司司並令吏刑部開具中三省具名取旨不以去官赦
降原減仍委御史臺常切覺察從之其後十二月二十
二日因臣僚言又詔及二人以上者令吏刑部檢舉上
件指揮施行十五日臣僚上言竊以審處經費首自中
都可謂詳節于內矣凡外之財計非不廣也其患在于
官吏經制無術拘摧失時欲乞明詔監司講出納之節
樽冗費之源郡邑之吏奉行有稱者許以名聞稍加旌
勸詔戶部審詳以聞十二月十三日詔帝王之盛州牧
侯伯致其外庸以和庶政群吏之治三歲誅賞罔朝以
來按察之權分路置使選用賢能不輕付畀比年擢任
庸輕職事曠廢竊據要司吏民惻笑掌漕事者歲計隨

乏土有闕供司憲禁者寇賊開作刑罰未哀常平不修
永土之利學校未開人材之衆或依勢作威妄自尊大
或嗜利自營漫不舉職欲重外寄其可得乎應今後若
除提點刑獄轉運使副以上須選曾任州軍監司臺諫
官寺監長貳郎中員外郎提舉常平等官許通選曾任
通判知縣寺監丞館職博士學行有聞政績顯著無賊
私徒坐非上書姦邪上等之人并歷任其名取旨差仍
令子細批書功過三省歲終考殿最事狀仰三省奏
定立法著于甲令務在遵守違者御史彈劾以聞其後
二年正月六日臣僚言新定監司之格非上書姦邪上
等之人亦許除授則中下之等皆在其選矣此降指揮

上書姦邪等不得就試學官夫試學官且猶不可而況
于一路按察之計能為陛下宣布德澤推行善政仰副
陛下紹述之美意乎且上下之等相去何若要之孫姦
邪則其揆一也矧當人材盛多之時諸路使輅不過數
十輩奚必用姦邪中下等之人然後竟其額邪願陛下
深念國體所係特降睿旨應上書姦邪等並勿除監司
仍乞于近降指揮內刪去上等二字詔依 二年十月
十九日臣僚上言竊見今日官吏其內外親屬之有權
者玩法如無法視監司長吏如無人且監察御史臺屬
也近者高宇為之其兄高定令襄之宜城恣橫不法貪
污害民刺舉按察之官非獨不繩其罪又且薦其材以

監察御史之勢已能屈陛下至公之法况宰相執政左右近侍之親戚乎伏望特降睿旨監察御史以上及宰相大臣其内外親屬敢有依勢犯法者監司長吏不得蓋庇如別因人言上達淵聽其本路本州按察官並嚴行典憲內曾經存舉者仍加等坐之不以赦降去官陳首原免則天下官吏皆知法不可屈非特吏民受賜亦震攝竒完整肅權綱之一端也檢會政和元年八月二十日敕臣僚上言郡縣之間貪污不法監司失職詔部使者振舉職業謹察貪吏契勘朝廷設置監司所以寄四方耳目職在糾察貪污勸率部屬比來彈治多出臺諫或是朝廷訪聞或因事冒呈所部監司恬然坐視全

無獨發偷安竊祿辜負使令遂致忠澤弗宣閭閻受弊
今來所言可令今後一歲中部內有似此違犯之人如
及三人以上者雖不及三人而或有曾并舉時准此其監司並令三省具

名取旨不以去官赦降原減仍委御史臺常切覺察詔
申明天下 三年正月二十四日尚書省言勘會昨降
指揮指揮州縣監司各修舉職事砥備朝廷差官點檢
及已降手詔訓諭令差官往四路按察監茶事合依已
降處分應州縣監司職事并許按察點檢若有違慢失
職或修舉奉公之人並許舉劾保明聞奏其畫一並依
前後察訪條例施行仍條具申尚書省沿路不許受謁
出謁不得受供饋及聚議會食之類與第二等友賜亦

不得妓樂接送有所酒之物如陳設家事什物之類並
合用官錢收買不得取借不得勾呼行人市戶諸色人
隨行供應如有公事許當職官見任官相見所至州縣
如有冤抑見在囚禁照證分明許即時疎放乞以聞其
挾私害法妄言惑衆即仰收禁奏取旨詔依奏報文字
許赴入內內侍省放進以展限五日出門二月十六日
詔監司不職者可並依在京諸司例沙汰四月十九日
詔請諸道監司置簿應一路州司錄事各以其簿授之
將事之稽違已經糾舉者具載其上候逐司巡歷到檢
察漕案對簿所記考其勤惰歲終諸監司各較定為優
劣悉聞于上以俟陞黜閏四月一日詔今後監司不許

任本貫或產業所在路分九月二十三日臣僚上言應
御筆寬恤手詔乞令監司類次悉于孟月上旬印給令
民間通知違者比籍緩制書律加二等從之十二月十
六日詔藝祖削平僭偽混一區宇監觀五代藩鎮之弊
專恣跋扈封靡自擅罔或率由于法度之內失取臣之
竊有未大之患乃罷藩鎮伴處環衛遘簡儒臣出補方
面百五十餘年海内蒙澤而分陝以西大河之東控制
二虜析路置帥皆公卿侍從之良州牧侯伯之選統列
城握強兵當重寄康鎮之厚卒徒之衆華資要職寵異
之數不為不至比年以來稍復縱弛破制玩法恃帥權
乘高勢而為邪無報國之心有營私之實或攘取幣藏

號為公使規半入已或私從禁旅營繕第家資給過往
虛稱白直率米為贖不可以數計料配軍民侵奪官酷
公私受害搔擾番戶賤市貴物不給其直貨賂交通汙
蔑監司耳目按察之官曾莫敢言至于理財備邊之術
足兵之計所當為者恬不為恤考其治效蔑如也今法
度具脩期于不犯疆土日廣期于富庶而閒寄之臣輒
肆抵冒殊負眷注比以數經恩宥未欲致于理自今已
往敢有犯者竄殛刑戮當不汝容仍仰監司耳目之官
詳究逐項事理各務按察彈奏以聞二十六日手詔陝
右宿重兵制黠虜本路所出既不足以充軍儲故資以
川蜀之供茶鹽之利及自今降雜本錢鈔金帛相踵于

道歲以千萬計將漕之臣不聞畫策以助邦計而每以
急聞上聞期于必得夫春秋租稅之入權酤鹽鐵之征
一切失催賤市虧折而不問掌計之官且何賴焉其各
親詣所部條具州縣出入之數措置之宜養兵裕民之
術實封來上毋為空言 六年閏正月三日臣僚言應
監司巡按並乞依陝西已降指揮收買飲食藥餌其餘
並禁止從之四月二日詔今後按次之官行部遇過馬
鋪兵委關湏得指定見少實數牒所屬照會方得依條
和雇無文移及不支雇直者乞重立刑名仍許雇人越
訴從臣僚請也七月二日詔應諸路監司不得抽取縣
鎮公人充本司吏職見供職人並放罷違者以違制論

監司互按以聞三十日詳定一司敕令所奏臣僚上言
近降睿旨陝西路監司不得赴州郡筵會及收受上下
馬饋送欲乞應諸路監司及依監司例人凡可按判州
縣者並依陝西路已降指揮施行所有置司去處合得
供給官為擾立正數許令收受等詔依令詳定一司敕
令所立法申尚書省本所今相度欲乞依置司州府知
州應受諸色供給之類並聽筭請外如遇出巡給解蔡
一道歸司日罷從之十二月十日詔依條立到諸監司
依監司例人凡可輒赴州縣筵會及收受上下馬供饋
按判州縣者同
者各徒二年 七年二月十二日詳定一司敕令所奏
諸路監司供給依置司處知州例支破其出巡或被旨

勾當公事除沿路上下馬饋送及筵會自依已降指揮
不許收受趁赴所所有置司所在州上路及歸司饋送
緣知州所無欲乞許令依舊例收受其諸路依監司例
人并凡可按刺州縣者亦乞無依諸路監司已得指揮
施行詔依十五日尚書省言勘會除監司已降指揮依
置司處知州供給過出巡給驛券外所有其餘官司屬
官欲過出巡亦許取券一道歸司日罷詔依 八年正
月二十五日詔五禮新儀州縣推行未臻厥成可令諸
路監司因按部考察勤惰歲擇一二以聞當議賞罰以
勸忠厚之俗八月十五日詔諸路監司及依監司依人
凡可按刺州縣者今後出巡除不許赴州郡筵會外其

上下馬供餽並依舊所有置司依知府知州供給之類
並遇出巡給驛券指揮更不施行 宣和元年六月二
月二十一日詔應除授監司可遵守前後詔旨擇材望
為衆所推曾任通判以上資任人元七月二十一日臣
僚上言先準詔監司按察一道祖宗以來所任必吏治
民資材兩得職事修舉近歲有初改官為監司者資淺
材薄取輕一路非使者之重今後差除監司並次通判
以上資序人具歷任取旨差竊見宣教郎蔡母慮特差
權發遣廣東運判母慮自政官後曾未三數月遽有今
來除命誠如詔所謂資淺材薄取輕一路非使者之重
也詔已降餘命更不施行 二年六月六日尚書省言

臣竊見遠方監司巡按所至差人夫戶馬多不依法雖有應破之格而州縣貪緣多差不以數計走吏皂隸皆乘戶馬負荷卒乘悉代之以人夫自至傳舍往往又為所轄者受賂而潛遣之復告逃亡再行差補一時搔擾至于如此宜部使者提綱一路當正身潔己使州縣有所規勸而身自違戾將何以糾察官吏乎欲望特降指揮嚴行戒約申明法令而告諭之詔申明政和六年四月二日指揮行下十一月一日詔近歲諸路諸司及帥臣添設屬官冗濫徒擾州縣無補公私可除學事鹽倉茶市舶坑冶鑄錢木機木植司陝西都平貨務屬官及提轄直達綱運外餘並依元豐員額以後添置員闕並

罷內學事坑冶鑄錢市舶司續添置官及臣僚陳乞添
設屬官並請州轉運司管勾並罷減罷官依省罷法十
八日臣僚上言竊見監司提舉一路事干州縣法令之
當檢察者其月不一每遇按行指摘點檢多不過數事
前期移文號為刷牒官吏承報必預為備而文之所不
載者曾不加省故吏或因循寢多曠失實由檢案之不
嚴也欲乞明詔部使者巡按所至各具所隸事目不以
巨細臨時摘取點檢不得預行刷牒州縣既莫知所備
則必事為之戒當使庶務畢舉固有闕遺矣詔依十二
月十五日詔監司郡守遵依累降御筆指揮並三年成
任今後通判准此 三年八月二十八日詔監司郡守

未滿三年並遵依累降指揮不得非時替移雖奉特旨
令三省執奏九月一日臣僚言四海之廣所與共治者
在守令而監司判舉之官也近歲以來任非其人背公
自營倚令擾民者比比皆是惟以附托權勢為計委之
營緝田產製造器用侵用公錢湏索誅求靡有藝極甚
則假托氣焰強市橫斂乞自今有敢蹈襲抵犯重立典
刑令御史臺及廉訪使者覺察按治該被委之者並以
枉法自盜論知而不案與同罪十一月二十二日手詔
重惟賦政于外俾德澤下究實賴外臺頃有他慢驕處
者亦足汰黜變而通之朕心庶幾焉自今應于政無補
于民弗便若蠹邦財害寶利者監司郡守悉以上聞務

從寬恤如觀望願避方命懷奸倚法以削朕當與衆共
棄罰不爾私 四年二月二十四日詔監司知通自熙
豐行官制後例替成資可並遵依舊制其治績顯著及
專委向當合滿三年或今再任者自依專降指揮十二
月九日刑部言增修諸轉運提點刑獄歲以所部州縣
量地遠近立分定歲終巡迴提點刑獄仍二年提舉常
平一年一編並次年正月具已巡所至月日申尚書省
以上巡未偏而移罷者至次年歲首新官未到即見任
官春季巡畢詔依十日臣僚言乞詔諸路監司未經上
殿者雖從外移並令赴闕引對方得之官庶幾聞章老
疾者無所容而真賢實能率職効力足以即副為官擇

人之意從之

六年五月二十七日中書省言勘會初

除監司合上殿人其見關官去處初除人未有指揮詔

今後就外初除監司人如係見關官去處候任滿日上

殿申明行下十二月十九日詔監司審擇縣令委有治

績連銜保奏每路不得過三人召赴都堂審察錄用如

人材卓異可備除擢取旨引對以言者論縣令雖有審

察之法未聞褒擢故有是詔七年六月十二日手詔

中都裁押冗濫立為經常簡易之制事協于至公法稽

于成憲百司庶府惟動丕應罔不是乎遵揚繼述之意

庶無愧于前人夫京師諸夏之本惠中國而綏四方之

道也承平日久法令明具可遵而不可失而僥倖苟且

之徒習尚弗虔為使文自營之計民繁物阜可安而不
可擾而貪賤刻薄之吏侵漁不已為豐殖黷貨之資甚
者託言公上以秦貢入之常賄賂要權以圖進取之策
浮靡相先費出無藝流弊滋久上下相蒙雖明示勸懲
申頒詔令而監司州郡恬不加恤然則國用安得不屈
民力安得不匱哉即臣監司各條具所部無名之費不
急之務以聞 高宗建炎元年五月一日赦應諸路帥
守監司許依例進貢推恩其因金人及盜賊曾失守或
逃避之人不許進貢十二月六日詔諸路監司應曾燒
剽州縣並躬親巡歷一歲再遍所至具月日申尚書省
仍開坐所措置過事尚書省類聚考其當否而為之升

黜從臣僚之請也

二年八月十七日朝散大夫充秘

閣修撰新差同提領措置行在茶鹽司徐公裕言契勘
提領官二員內梁楊祖係發運使兼領前官楊淵乃工
部員外郎係第二等奉使同領以上逐官應干事件各
有本職任條法外今來公裕係是正除上件官所有服
色序位刺舉請給人從等並未曾有立定指揮詔並依
發運副使條法施行內舉官減三分之一 三年二月
十八日知平江府湯東野言元豐政和令節文諸發運
監司因點檢或議公事許受酒食其巡歷所至薪炭油
燭酒食並依例聽受續準宣和二年御筆每歲巡歷所
部並一出周遍即有故復出者不得再受所過州縣酒

食供饋今軍興之際調發緊急百須應辦巡歷不常入
非平日無事之比難以指定歲終巡遍之限倘使區區
往來道路之間供給所入不足以備所費而又僻宇所
在合得供給例皆微薄見今物價踊貴既不足以糊口
又使更營道路之費深恐未稱朝廷所以委寄部使者
之意欲並依元豐政和條令施行詔權依所乞三月二
日詔監司緣事擅置官屬理當重寘典憲為累經赦宥
特免行遣其所差官並罷今後更敢擅自差置者差與
被受官並徒三年所在官司不得放行請給四月十二
日詔諸路州軍除添差宗室歸朝官存留外餘並日下
減罷監司屬官依此施行其江東路經制司屬官日下

減罷所有職事並令安撫司屬官兼領九月十七日詔
諸路監司今後差官屬出幹事不得差待闕官如輒差
其元差官司及被差官各徒二年不以去官赦降原減
十月一日臣僚言自宣和以來至今為州縣之害者賊
吏是也賊吏不除民無安靖之理欲乞立法應按察官
自通判至監司每半年具發過賊吏若干人並籍記
姓名以為殿最或當劾而不劾致因他事暴聞者其不
劾之官並重行貶黜詔每年一次令諸監司按察官具
發過賊吏姓名申尚書省置籍四年二月二十三
日德音應軍民疾苦或刑政未便事件仰監司採訪聞
奏六月三十日詔應監司巡歷去處除合得供給外輒

使

以米麴償錢于所部公使庫買酒

緣本司職事于所部州取者非入已

者以自盜論不入者以坐贓論十月四日詔應監司被

旨體完公事如敢違延觀望及徇情減裂令御史臺彈

奏重寘典憲 紹興元年正月一日德音方今州縣積

弊百姓疾苦朝廷無由盡知今令諸路監司及郡守縣

令各據一路一州一縣隨所在合有可以罷行事件詳

究條具申尚書省如實使國利民當議褒賞五月二十

五日御筆監司以侍從所荐縣令不法不即按劾重寘

典憲上以侍從薦縣令如將來犯贓則與同罪若按發

一人則并坐舉者監司必觀望有所不敢故戒飭之

二年二月五日臣僚言近葉夢得李回馮漸並以曾任

執政陳乞子姪為監司屬官至或創添窠闕與之且監
司屬官並係堂除若發運司則歷通判其餘往往亦與
諸州通判敘官過本司長官出簽廳實行其事其權甚
重豈可輕畀未出官人請收還夢得等三人已降指揮
令別陳乞合入差遣其以前未曾出官經任堂除屬官
人不以己未到任並令放罷歸部別選歷任三考以上
實有材能之人以重其選從之十八日詔今後監司令
三省取見本貫不得除鄉貫係本路人九月二十八日
詔今後諸路監司及安撫等司屬官元額之外不得以
軍期為名輒行奏辟及見任罷任待闕未出官人並不
許暫時虛作名目差委出入被差之人計俸坐贓帥司

監司別行黜責十一月二十四日詔應寬免詔旨令諸
路監司每季具所部州縣施行實狀上聞其奉行周悉
與夫苟簡者精加檢察為之賞罰三年三月十九日
新除淮南轉運副使郭康伯言先在揚州居住有父母
墳壠并產業礙監司不許任本鄉貫指揮詔淮南係緣
邊去處既非本貫雖有墳壠自不合避二十六日司封
員外郎鄭士彥言真宗即位之初謂宰相曰天下物宜
民間利弊惟轉運使得以周知當今更互赴闕延見詢
訪以今日論之宜不止于轉運使而已若獄訟之繁關
茶鹽之利病舶貨之低昂鼓鑄之多寡各有司存乞依
祖宗舊訓應監司提舉官因事到行任所並令引對不

許免除奏稟職事之外凡可以救時濟治者悉許敷陳
詔除兩浙路外餘依奏六月五日工部侍郎李燿言願
擇知州資序以上人充轉運使副與提點刑獄第二任
通判資序以上充轉運判官坑冶提點官初任通判資
序以上充茶鹽市舶提舉官若資序未及則擇嘗歷郎
官監司郡守行治有稱者充其選詔令三省常切遵守
五年閏二月十九日詔諸路監司屬官除轉運司主
管帳司提刑檢法官外餘並堂除內兩浙轉運司催促
權買官減一員往來催促剋剋起發行在米斛官二員
並罷仍並差令錄以上資序曾經任人三月八日詔應
諸路監司取會州縣三經究治不報住滯人吏杖一百

勒停當職官申尚書省取旨 六月二日神武副
軍都統制岳飛言將復襄陽府路未曾差置監司許置
監司一員兼領諸司事務九月十四日勘會諸路監司
與本路安撫大使司宣撫司行移並用申狀令四川轉
運使李迺係龍圖閣直學士其與四川安撫制置大使
司及川陝宣撫司行移未有指揮詔並用申狀書檢不
繫街十二月十八日詔監司守貳委寄非輕除授非人
百姓受弊比年員多闕少致有除代數政去處尚慮選
擇失當其間不無望實未副之人可令中書省開具已
除監司守貳職位姓名送中書後省御史臺照會仍令
今後過關到前半年取索以次待關官出身歷任脚色

並加銓量如有不可任用之人具詣實聞奏與改作自
陳宮觀 七年五月二十六日中書門下省言諸路監
司係通治一路祖宗法即不避本貫詔監司除授依祖
宗法施行內本貫係置司州軍者即行迴避閏十月二
十九日右正言李誼言今後除授監司不以本貫人其
見任并已差下人乞與鄰路兩易其任庶幾公道稍開
私門稍塞從之繼而中書門下省勘會福建轉運葉宗
諤提舉兩浙市舶章蘭提舉浙西茶鹽章茂並礙本貫
詔葉宗諤改為江西漕運使替徐林章蘭改為提舉廣
南市舶替黃大名並成資閣提舉浙西茶鹽章茂與提
舉江東茶鹽徐康兩易其任 八年正月二十一日詔

今後諸路監司知通提舉坑冶茶鹽市舶當平主管官
除代不得過一員監司屬官諸州教授除代不得過二
員 九年五月十六日樞密院檢詳諸房文字晁謙之
言竊見外路監司郡守按察之際初不體究其實但知
便文自營改易月日恣作前期奏劾習以成風至有一
郡之內凡起數獄者或流入為深刻或濫及于無辜乞
賜戒敕凡案發之際先委清強忠厚之士體究得實方
聞于朝庶幾人自無冤從之 十一年九月十二日臣
僚奏乞凡監司容縱賊吏並不按勘而為臺諫彈奏勘
鞠有實者其監司亦坐之輕從降秩重或免所居官俟
奏斷日令大理寺貼說取旨從之 閏四月十一日又詔

中嚴行下二十六年九月一日又詔如臺諫彈奏外人
戶論訴得實其夫按察監司令刑部具名中尚書省取
旨 十三年二月三日詔諸路常平司職事令茶鹽官
兼領八月三日詔每路委有出身監司一員兼提舉學
事如本路監司並無有出身人即從上一員兼管 二
十六年二月二日詔諸路監司仰依法分上下半年出
巡脩舉職事除坑冶司外其諸司官屬並不許差出五
月十四日詔近民之官莫如郡守其間職事脩舉治狀
顯著者可令監司連銜保明聞奏當議甄擢六月四日
詔諸路監司躬親遍歷所部州縣詢訪廉察官吏條具
奏聞當議黜陟八月十三日上謂輔臣曰新除兩浙二

漕臣卿等可召至都堂面諭近屢降寬恤事件到任後
令遍詣所部稅賦之足否財用之多寡民膏之休戚官
吏之勤惰悉加訪問如有奉行弗虔職事不舉者並按
劾以聞庶幾可以警動諸路使皆知所親做九月十四
日詔曰朕宵旰圖治誨求民瘼詔旨屢頒務行寬大革
去煩苛監司之職臨按一路寄耳目之任專刺舉之權
命今之下是宜悉心布宣庶使郡縣得以視做乃奉行
不度徒為文具致事有壅滯茲獎弗除欲實德及民其
可得乎至如官吏廢弛不聞有所懲治乃或上下相蒙
習為偷惰甚無謂也繼自今其究乃心率乃職以祇承
朕命其或不恪委臺諫按劾以聞當寬重憲十月五日

中書門下省檢正諸房公事陳正同言監司按治之積
相踵而上姦賊者懲戒既嚴而不旌異循良恐或未盡
乞更令諸路監司採訪部內有愷弟之政宜于百姓潔
已奉公不邀虛譽者拔擢一二人不次用之庶幾感惠
兼行人知勸沮上曰卿此論甚合朕意今日方有一郡
守為監司所薦已今除職再任任滿與陞擢差遣矣
二十七年六月四日詔諸州軍上下半年多開具監司
出巡將帶人數并批支過口券數目及有無應副過河
索物件供申戶部點檢八月八日左司諫凌哲言比來
州縣官吏每遇監司巡按帥守移替例皆傾城遠出為
監司帥守者亦輒受而不辭乞嚴飭于諸路監司帥守

互相覺察應所屬見任州縣官不應迎送而輒出迎送與不應受而輒受之者並須依公按舉寘之典憲其或徇情容庇委御史臺彈奏從之十一日詔諸路監司可將所借管下州軍兵士盡數發歸元差去處今後監司接送據依條合破人數分下諸州差撥候接送畢即發回仍專委帥臣覺察以知邵州趙不如言監司赴上替移例于管下州軍差撥廂禁軍既而更不發回別給口券所費不貲乞行禁止故有是命 二十八年七月十七日詔監司按發屬吏仰依條不得送置司州軍如所犯稍重即申取朝廷指揮委隣路監司選清彊官就本處置獄推究其州軍按發官吏即申監司於隣州差官

所委官不得避免及接見賓客仍限三日起發如有違
戾重作施行十月十二日左正言何溥言乞詔大臣應
監司郡守除命既下即日起發或以疾故丐祠祿俟終
滿方許陳乞如或違戾令御史臺糾察從之十一月四
日詔諸路州軍合依錢物糧斛仰所隸監司將違限施
欠最多去處當職官吏依然按治監司如在置司州軍
或因出巡到州縣方許時暫勾追都更典押整會供報
以左正言何溥言財賦積欠所在而有監司帖州則追
都更州帖縣則追典押一歲之間殆無虛月徒有勞費
無益于事故有是詔二十九年八月十八日詔兩浙
東路提刑徐度兩浙西路提刑呂廣問候滿日召赴行

在除在內陞等差遣初度等有召命司諫何溥言監司
擇人每患其難今既知其可用復不使少安厥職恐來
者未必如舊送迎紛紛重為勞擾乞令二人依舊供職
或有顯效寵昇職名俟其終更乃加召擢故有是命

三十年十一月十二日京西路轉運判官兼提刑提
舉常平茶鹽等公事蔣汝功言吳勣淮南東西路監司
依諸路屬官已得指揮隨置司州軍推賞今京西路轉
運提刑提舉在襄陽府置司正係極邊乞依淮南路監
司一體推賞從之 三十一年二月二日軍器監主簿
楊民望言監司三獎曰按吏所以除民之姦賊而忤已
者搜索其過奉已者容庇其罪以示威福一也巡按所

以察郡縣而卒伍菲屨之資胥吏囊橐之賄一縣或踰千緡二也居處多藉狹綿以公使奉其奢華不足以示儉宴會迭送錢計其月收過于供給不足以訓廉三也此三者監司之弊他道未必皆然蜀去朝廷最遠吏尤自肆乞命四川帥臣監司互從從之孝宗紹興三十二年八月二十三日元末改中書門下省付下內降寬恤事件勘會監司巡歷不得過數將帶人吏于州縣乞覓計贓坐罪其以白狀借請州縣錢者準盜論所取索文案置厯委守貳令佐發遣其諸司屬官過往及通判職官李黜行縣依有違戾監司仰御史臺彈劾州官今提刑司按勘以聞十二月三日詔曰朕欲膺慈訓誕保

斯民永惟戚休繫于牧守昔我祖宗每思共理乃分道遣使以寄耳目守之臧否靡不周知故累朝之民安于田里法令猶存而人莫克舉是以循良不勸而貪穢未革將何以助朕為治咨爾使者其悉乃心察列城之政舉循良勅貪暴及疎怠曠職者以聽陞黜至于任非其所長無他大過者亦條列以聞朕當命以他官刺舉以公朕則有賞阿私失賞罰亦隨之其令諸路帥臣監司限兩月悉具部內知州治行臧否連銜聞奏苟違朕言令御史臺彈劾隆興三年三月七日詔朕自即位以來累降詔旨優恤軍民其令尚書省下諸路帥守監司開具見已如何施行務使實惠及人無或失信敢有不

度必罰無赦五月十一日詔自今後應除監司於闕期
前具名取旨仍令先次上殿不得在外又以資序差除
可立為定式九月十五日臣僚言乞專降指揮應監司
並不許將親隨僕便在任所如遇出巡除依條合帶吏
人二名客司書表一名當直兵級十五名不得以承局
茶酒等為名別差人數及不得令隨行人吏兵級於合
任日數外借支食錢等乞取錢物如違許人越訴監司
不互覺察與同坐從之十月五日侍御史尹檣言本臺
每日受諸路州縣民戶訟訴多是官吏擅行科擾肆為
貪取雖有監司不為受理以遠在數千里外不憚勞費
前來陳狀欲望特降指揮自今後許本臺取每月臺諫

官所諭州縣官吏貪汙罪犯及因本處民戶陳論得實
施行事項監司不曾按發究治擇一二多者具名奏劾
將本路監司重行貶黜庶使遠方之民得以安業從之
乾道元年正月一日大禮赦文勘會監司巡歷州縣
依條不得過三日詔聞近來多是過數收受饋送并隨
行公吏已降指揮借請歲不得過兩月却有直判白狀
重疊過數借請乞取搔擾若州縣過數供送并仰監司
互察如違令御史臺彈劾十八日臣僚上言臣聞臺諫
之與監司雖內外不同其為耳目之官均也臺諫之察
郡邑孰若監司之詳且當今監司不刺舉而必俟臺諫
按劾是奉陛下之委寄也欲望特降睿旨戒敕諸路監

司察郡縣之吏不職不法者按劾究治罰一懲百如隱庇不舉致臺諫論列必議失察之罪庶幾內外協心官吏知畏從之五月十四日詔令逐路監司帥守講究實有革弊事聞奏毋事文具六月四日潼川府路轉運判官壽敷奏郡守多自外除用或在任選易其有老病者朝廷莫得而知之縣令皆外臺擬注而銓量之法益為文具老病者以資格得之守令如此斯民何賴焉乞下諸路監司將凡任守令公大銓量判郡守老病者具名聞奏縣令老病者徑從罷免若監司容隱亦必寘之嚴科有旨實敷所奏雖當今監司例為文具從來未見公劾可劾俞本人到官當踐其言勿為循習取容朕臨

遣之意七月七日詔諸路監司將見任老病守臣限一
月公共量聞奏知縣委守臣體訪申取朝廷指揮如
監司守臣互為容隱御史臺覺察以聞十二月十四日
詔應已授監司郡守人候闕到半年前行在奏事訖
方得之任如本貫川廣見在本鄉居住之人即仰逐州
知縣結罪保明議實申取指揮 三年閏七月十五日
詔今後監司郡守除授訖已上殿應赴在二年內者與
免將來奏事候闕到前去之任其赴在二年之外及除
授未經上殿人依已降指揮闕到半年前行在奏事
訖之任 四年六月十四日臣僚言紹興二十八年指
揮監司郡守按察官吏往往只送本州或置司去處不

無觀望致有寬濫今後監司按發官吏不得送置司州
軍事理重者委鄰路監司選官郡守按發官吏申監司
於隣州差官推勘其法雖已詳備而尚有可議者如監
司郡守按發所部官據憑一時訪聞賊私罪犯便具申
奏致獲降指揮先次放罷後來勘得止係公罪于法不
至差替衝替追官勒停其被按發之官情實可憐乞降
旨應監司郡守按發所部官致獲降指揮先次放罷後
來勘得止係公罪于法不至差替衝替追官勒停如元
是堂除與本等近聞差遣或係吏部差注與先次注授
差遣庶幾枉被按發者不至失所從之六月二十六日
詔今後守臣有罪狀顯著或職事不舉而監司不即按

劾却因他事發覺三省具姓名取旨守臣不按知縣亦如之以尚書省勘會累降指揮戒敕諸路監司按發所部官職汚狼藉職事昏謬為民害者非不嚴切近來往往坐視守令治政乖謬全不按劾未欲即加典憲理合申嚴約束故有是命七月十三日臣僚言郡守縣令治所部之冗頑犯法者監司郡守劾所隸之賦私不法者皆所以奉行天子之法也比來多有所部之民所隸之吏曾被治劾者懷怨挾恨隨即媒蘖其私公肆論訟以償憤怒之氣俾其訟得行而以罪加于治劾之官則天下之為守令監司稍不自強者則必畏首畏尾有所忌避是民之冗頑吏之賦私者殆將縮手而不敢問矣守

令監司真有過差他人訟之可也豈應有嫌之人所得而告此而不懲則告訐之風日長姦惡之俗日滋實傷害風化之大者欲望特降指揮戒敕中外如有曾經守令監司之所治劾者輒敢以私訟元治劾之官不問事之虛實即以告訐之罪罪之庶幾此風衰息助成忠厚之化詔依 五年四月十三日臣僚申請將廣西轉運使副提刑合得到任恩澤乞罷去候任滿與轉一官詔從之九月四日詔諸路監司今後分上下半年依條巡按詢訪民間疾苦糾察貪墮不職官吏仍具詣實以聞如依前容縱公吏等乞覓搔擾當重寘典憲以中書門下省勘會諸路監司近來多不詣所部州縣巡按官吏

貪墮無所畏憚間有出巡去處又多容縱隨行公吏乞
覓搔擾理宜約束故有是命九月六日新差權發遣江
南東路計度轉運副使程大昌朝辭進對上宣諭曰近
來監司多不巡歷御為朕徧行諸州察守令臧否民情
冤抑悉以聞奏 六年五月七日詔今後監司郡守闕
到合奏事之人如到國門日徑劄閤門引見上殿更不
逐時畫降指揮閤五月二十六日臣僚言國家建官以
察所部雖所掌之職不同欲共濟王事則一也然而監
司徇私黨局凡有施行不相照應從漕司則違憲司從
憲司則違提舉司遂使州縣難于傳承甚者或務姑息
或為矯激專欲沽百姓之譽不恤州縣之難行惟原其

故多由清要持節不諳州縣事體故所行若是乞自今
清要官補外不曾厯州縣者且令治郡俟有善狀擢為
監司未晚詔依六月三日詔諸路監司責任非輕近來
多有闕官去處可檢照累降卿監郎官更送補外指揮
施行七月八日詔川廣監司郡守未經上殿許先赴任
之人今後任滿須赴行在奏事訖方得再有除授八月
二十五日中書門下省檢會紹興七年五月二十六日
敕勘會諸路監司係通治一路祖宗法即不避本貫內
本貫係置司州軍者即行迴避有旨今後除授監司可
依前降指揮施行二十八日吏部勘會淮南京西利州
路監司屬官到任任滿依條法許依置司州軍推背今

來極邊州縣官承指揮增賞到任任滿共轉一官其監
司屬官亦合一體今欲將淮南監司屬官應得酬賞各
隨置司所在州縣官格法合依乾道五年十一月指揮
推賞從之十二月十一日詔淮南東西等路監司帥守
察本部沿邊縣令職事修舉者保明聞奏從淮南東路
安撫使晁公武之請也 七年二月八日詔方今州縣
積弊百姓疾苦朝廷無由盡知今諸路監司帥守限一
月各行講究條具一路一州一縣便國利民事件以聞
十月十二日詔諸路監司將白直人兵照條於置司州
差破外將諸州抽差人兵盡行發遣如違令御史臺按
劾以三省樞密院勘會諸路監司合破白直人兵皆有

定數訪聞比來別立名色多行占破却于所部州軍差撥軍兵赴司就置司去處添破口食以致郡計闕乏甚為大害故有是命十二月二十五日詔諸路監司昨裁減準脩差遣差使兼闕可復置並差選人其諸司屬官幹辦公事並差京官以上已差幹辦公事非京官人候回日依紹興二十八年五月二日指揮歸吏部依格差注 九年六月八日詔令諸路監司郡守不得非法聚飲並緣申請妄進羨餘違者重寘典憲令御史臺覺察彈奏八月二十日中書門下省奏勘會已降詔書勸課農桑并遍牒考課條法詔令諸路監司郡守恪意遵行限次年正月終各保奏以聞毋致違戾十月七日詔遵

路漕司行下本路州軍各差通判或簽判一員專一主
管歸正官按月幫支請給并安泊去處應干事件務要
存恤月具支過人數錢米数目申樞密院二十三日宰
執進呈敕令所修立監司互察等條上曰監司委寄甚
重此條使互相按舉恐于事體未是雖如此修改大意
亦是互按卿等更宜詳悉理會不然除去此條亦可十
二月十五日詳定一司敕令所狀已頒乾道海行條法
其間有得旨刪改條件合遍牒內外通知一諸監司準
指揮分詣本路州幹辦者各具本年已分巡歷處有方
聽巨條一諸監司每歲被旨分詣所部點檢催促結絕
前去見禁罪人限五月下旬起發雖未被旨亦行過本司

官或專奉指揮

及朝散捕盜捉獲河防不可親詣至七月十五日以前
者妻孥職官仍具事因中尚書省

巡徧仍具所到去處月日申尚書省詔依二十三日權
戶部侍郎蔡洸言諸路州軍起發上供并經總制等錢
各有期限賞罰比年監司不體法意其起發如期者皆
與保明被賞而違限者未見其舉劾也有賞無罰人無
懲勸乞嚴飭諸路監司依限催發其守貳尚敢違例許
臣擇其他慢尤甚者按劾奏聞監司不行糾察亦俾坐
罪從之 淳熙元年三月七日尚書省言諸路帥臣監
司下文武臣準備差使並改作準備差遣見任并已差
下人並今依舊滿任武臣自今悉從堂除與大臣例為
屬官從之 二年十二月十二日七月七典赦應年七十依

法不除監司郡守如歷任有治績而精力尚強之人令

三省取旨

詳見和府
州縣並

三年二月八日詔除授四川監司

帥守如已被受信劄令不候授告敕先次赴上自今準

此九月六日詔詣路監司互相饋遺及因行部報受折

送者以贓論以臣僚言近歲監司臨按多受饋餉行部

例有折送錢物數目至多又有無忌憚者諸司互以錢

物饋送皆以折酒為名賕餉相通專濟私欲乞嚴真刑

章必罰無赦計其所受悉以贓論在內令御史臺彈劾

在外許諸司互察故有是詔十月十四日詔自今監司

被受三省六曹委送民訟並仰躬親依公予決戾速回

報若事干人眾或涉遠路須合委官定奪亦仰立限催

從候所委官申到從本司再加詳審別無不當方得具
申仍令所屬曹部置籍稽考如有違戾取旨施行 五
年十二月十六日右諫議大夫謝廓然言乞自今除授
監司並須先契勘年甲或已年及即乞只與祠祿庶得
持節之人類皆彊明振職從之 六年九月二十五日
臣僚言乞下諸路州縣應監司使命經從祇令于門外
相見諸司屬官及應沿檄被差過往之人並不許迎送
免使官吏隳廢職守軍兵妨奪教閱從之 七年正月
十三日起居郎木待問言監司巡按州縣乞如臺制不
報謁賓客上曰監司巡按州縣留不過三日若更報謁
飲宴別何哉更姦去民瘼耶自今後許接見賓客不許

報謁仍不得赴州郡宴集三月九日詔監司郡守條具
民間利病患以上聞無或有隱既而中書舍人鄭丙言
昨詔監司郡守到任必以民間利病條奏而所在乃以
細故塞責民之疾苦不以上聞如廣西因草竄之變陞
下令諸司講求利害始有打美歲計之請如南劍州道
士邀駕訴本縣科敷陞下行下本處覈實如近日臣僚
進對言諸路敷酒捉酒之弊陞下始行約束皆非本路
監司守臣之所自言乞行申救故有是命 八年二月
二十七日臣僚言四川去朝廷最遠其在本處後監司
太守差遣者既免奏事一任復一任至有不出已峽周
旋麾節一二十年而未嘗至輦轂者賢否皆不可知宜

今久任四川監司郡守人更迭為東南差遣其在任未
久者既有任滿前來奏事指揮候到闕始得別與除授
從之七月二十三日詔帥臣監司以勸農為名自當朝
夕諮訪以待上問比者數命諸道條具雨暘豐歉之候
乃或泛言某郡某縣大畧如何或云見行取會顯屬文
具即自令行下所部令諸縣五日一申州州十日一申
帥臣監司纔候指揮到日帥臣監司即時開具聞奏其
或不盡不實並當黜罰 九年三月十八日臣僚言頃
詔監司帥臣臧否所部歲終以聞然郡守更易不常監
司帥臣好惡不一則言有當不當有已去而不及臧否
者有近到而已過臧否者或取其辦事而不言其害民

或喜其彌縫而不言其踈謬或畏其強有力而不議或
以其踈遠無援而見斥望復詔諸路監司帥臣自今減
否所部必須提計一歲之數不問已去見在就其中而
區別之或減者朝廷已加擢用則具其減之次者或否
者朝廷已行罷黜則具其否之次者其有減否不當者
必令具所以聞詔除初到任人外餘從之先是正月十
三日詔諸路監司帥臣淳熙八年分歲終各合減否所
部守臣今日下聞奏至是臣僚復有此請四月四日詔
臣今盜發所臨其帥守監司不能先事彈壓仰三省樞
密院具名將上先議責罰如平定有勞却行推賞十一
月四日臣僚言監司守臣所部官吏因不職對移自有

成法訪聞近來多任私意不俟奏報顯屬違例詔吏部
檢坐見行條法申嚴行下 十二年六月二十六日進
呈諸路帥臣監司每遇歲終各以所部郡守考察臧否
來上新宋一路最近淳熙十一年分至今尚未開具聞
奏鄭丙等擬展二年磨勘上曰近來廢弛事多須當懲
誠可並降一官八月十四日新除監史冷世光言監司
歲出巡歷吏卒誅求所過驗然有過使錢有輕賄錢有
過馬券食錢一縣之中凡數百緡僅能應辦否則晷晷
以興怨据憊以生事乞明詔諸路監司今後巡歷所至
力革此弊所用隨行吏卒各于州郡差撥逐州交替庶
幾杜絕誅求之擾從之 十三年七月九日詔監司去

處守臣暫闕令監司兼權若監司兩員去處別依官職
次序如遇監司巡歷時暫令本州以次官兼權毋得輒
受知州上下馬供給公用之類從臣僚請也 淳熙十
六年七月十四日臣僚言今來監司有興販木植動以
數萬高立價直以年厚利至于貨賣不行抑令所屬州
郡變轉州貢之於縣縣敷及于民至有鬻產送納况牌
役所過場務既免征税而住賣之處亦無抽解不惟暗
失官課又且攘奪商賈之利乞嚴立禁止如有違戾許
令內臺糾察重寘典憲從之十九日臣僚言乞詔二三
大臣取諸路見在職任及已差除監司姓名畫一開具
稟取聖斷將其間素無材望又無績效之人改授州郡

差遣若昏老庸謬并無廉稱則或與官觀或遂廢斥如
此則見在不才監司可得而汰去矣又言乞詔侍從臺
諫集議公舉才力可為監司者上之宰執所知則許自
薦籍于中書遇有負闕即于其間選授如此則將來監
司可多得其才者矣從之十月九日詔川廣監司郡守
未經上殿許先赴任之人如連任上件差遣任滿洎赴
行在奏事訖方得再有除授見闕取旨二十三日前行
知南安軍方岳卿言乞明戒監司凡官吏罪之當按者
不必互相闕白各以所察之實明著罪狀若果衆所共
惡自應不約而同若其意見有殊或臨部未久更須詳
核亦不必以失按為過庶幾監司得以各振其職而為

之官吏者樂于自展所長不虞異見之罰從之紹熙元
年二月二十三日臣僚言乞自今除授監司必選擇曾
任州縣之人苟未歷州縣而爵位雖高亦須使之試郡
而後除庶于州縣事體身曾親歷不至于持未試之術
行偏見之私從之六月十九日詔今後郡守監司其間
有賦污狼藉曾經論列或曾被按劾而事昭著者暫仕
祠祿之後不得復任監司郡守從臣僚請也十一月二
十一日御史中丞何澹言竊見壽皇在御每因監司有
闕于少監而下親自拔擢人人感勵號為稱職近日監
司適有虛員亦有闕次不逮者願陛下出自聖意擇朝
臣之久次而人材為衆所推許者分遣以往以為初政

特達之舉以重諸道按察之權詔三承以上久次有材
望可為監司者選擇差除二年四月十一日臣僚言
近來監司未知舉察罕事按刺乞詔有司考監司之績
凡其按察刺舉之職振而風采著者與加旌擢倘一任
之內默默全無按刺與一路之間官吏有不治之迹因
事自彰而失于按刺者以不職之罪罪之從之六月一
日臣僚言至尊壽皇聖帝屢申嚴守臣僚具裕民五事
之制淳熙法書告成遂以守臣到任及半年以上具的
實民間利病事件以聞著之於令欲乞今後監司到任
半年亦令條奏裕民事件務要的實利便不得減裂大
具庶幾廣求民瘼悉以上達從之五年九月二十一

日中書門下省言四川二廣其地險遠遇監司闕官士大夫資望稍高者皆不願就無以深慰遠民之意乞今後于寺監丞內選差從之二十七日臣僚言竊惟今日至急者惟有拯救諸路旱傷一事茲事甚大責在監司監司得人則州縣各自完心赤子均受實惠今救災之責尤急于常平使者目即災傷去處尚且闕員雖或已除而在遠者展轉必至窮冬救災之務要及西成之際或就糴他方或移撥近地或輸陳粟或督種粳麥皆在此月之內若至天寒歲暮則後時無及差擇監司豈非今日急務近年以來立為二著三丞之限材與能者始不得以備緩急之用只如壽皇之朝或自寺監丞及百

執事便與持節者累累相望其人見朝廷非次擢用必
思悉力報稱昨日伏聞已降指揮川廣監司得不以資
格受任臣知陛下之心與天下公議相協但遠民之可
念未若近民逼日迫切之情欲望亟降睿旨去近歲監
執資格之說遵壽皇選吏之規諸路見闕使者俾于班
列之間疾速選差真實體國愛民之吏以收人心以回
天意從之 慶元元年十月二十九日殿中侍御史黃
黼言竊詳吏部銓法年六十五不許注知縣巡尉巡尉
以警捕為職而縣有人戶社稷財賦獄訟其責任之小
者尚爾而況於監司郡守乎乞檢舉紹興二十三年十
月二日三十二年正月十三日隆興四年三月十四日

前後指揮令尚書省行下吏部再行申明監司郡守年
及七十者其見任人不至疾病自毫廢事聽其終任改
畀祠祿如有年毫疾病之人許其自陳以全其進退之
義自今年及七十者不除授監司郡守著為定令從之
十二月二十六日臣僚言乞今後應除授監司及已除
未上之人並須曾作州縣及厯他司者庶幾諸路皆受
大賜又可使人材之練厯前來三丞嘗降指揮許作監
司今亦乞考其資厯如不曾經歷州縣且與見闕州郡
以試其材俟有政績即行陞擢庶幾內外均一從之
二年九月二十七日臣僚言監司帥守今于迎送之間
一切踰法過制既破兵衛之給又邀舟楫之用方來則

文移征索以為當然暨去則自為囊橐取又數倍今宜立為之法使舟行者錮其兵衛陸行者禁其水脚或兩有所取者其一以贓論迎送兵之多寡遠近並以成法申嚴行下從之 三年五月十一日殿中侍御史張奎言乞今後有自朝行吏迭補外而未經作郡之人及在外雖經作郡而不曾考滿者並且與知州軍差遣俟其治行有聞然後擇尤異者以節畀之庶幾諸路耳目之寄盡得老成更練之人而措諸政事無捍格不通之患從之十月六日臣僚言辰沅靖在湖外為至僻之郡其地至狹其民至貧三州之境相接蠻徭生界不率與之雜處若州縣政平訟理拊摩得術則百姓安業邊方帖

然豈復有侵擾騷動之患向來所以聞曾剽掠敢入熟地作過亦州縣為政乖謬有以致之夫州縣官吏從事於此地非不知百姓之不可虐生界之不可擾竇緣三郡去朝廷至遠凡事輕忽得以自恣所賴監司歲一巡部故風俗之美惡獄訟之繁簡官吏之貪廉蠻人之出沒皆可察訪而賞罰之今提刑提舉在常德為置所之所窮年卒歲足跡未嘗一到究其所由蓋緣三州之地荒陋遠僻非特水陸皆險舟車不便行役所以亦難之行下湖北 提舉兩司每一歲分上下半年必要遍歷三郡以察官吏以問風俗以安蠻僚從之十二月十一日殿中侍御史張釜言乞四川諸路帥臣監司今後

不許令隨侍子弟互注沿邊有資去處案關應廣西州縣見任官諸司不得存留在置司確攝有坊本任職事如有違戾在外許諸司互劾在內委御史臺覺察彈奏重寘典憲從之 四年正月十六日監察御史張巖言孝宗皇帝有詔宰臣云監司民之休戚係焉今後二三大臣宜精加考擇既按資格又考材行合是二者斯可進擬前日臣僚之言資格已正臣謂材行尤當深考也欲望睿旨凡前所除授未經作郡除監司已在任之人若有聲績著聞卓然超異者可令終任俟解替日朝廷別與見闕州郡如已試平平如足采錄者似不應濫居其職即與改郡更令詳試民事若尚待次即令換合入

州郡侯有治行尤異然後畀之以節如此則資格材行二者俱得其于人情公論方為愜當從之二十二日石正言兼侍講劉三傑言乞今後監司郡守應以疾患控列別無規避者即與將上取旨畀之祠祿以均閑佚其抱病日久不以自陳致有廢事者郡守則令監司覺察監司則令諸司互察使賜罷斥或有隱蔽而不以聞者則令御史臺劾奏亦與黜責庶幾各知廉耻不敢養疴以負朝廷之隆委從之五年八月二十六日臣僚言乞備坐慶元重脩條令行下諸路監司嚴切戒飭今後通管每歲編詣所屬巡按候起程有日先次奏申其所歷郡縣或曾興除民間利病刺舉官吏賢否應有已施

行事件並於回司之後限在半月內逐一開具聞奏并
中尚書有諫院御史臺如有違戾仍前視為文具委自
臺諫覺察彈劾重寘典憲從之十月二十七日右諫議
大夫兼侍講陳自強言乞諸帥臣監司今後屬官遇有
合行按發事跡即當論奏毋得黨庇一或黨庇致有臺
劾則必量其輕重以罪其長如此則為之長者斯以時
而覺察為之屬者亦自知于循謹從之六年正月二
十三日臣僚言乞申敕監司使之恪守成憲明知分道
置使其職在于按察若州縣吏職汚不法繆懦不治劾
章不以上聞致有臺諫論列者當併責罰仍詔大臣其
於諸路監司遴選賢德重厚風采有望之士俾當其寄

庶幾上下相維內外一體從之 嘉泰二年十月四日
臣僚言內外庶官除授監司郡守在七十以前而赴上
之日適年及七十者闕到之日許其自陳今赴闕奏事
儻于堂察臺叅及陞對之際見得其人視聽不衰筋力
尚強猶可委使及自指揮下日見在任之人並合滿此
一任然後納祿不過踰致仕之期僅一二年爾庶幾有
志事功者不以年高而終棄而監司郡守亦多得老成
更練之人其有日暮途遠恃老貪汙不知止足者則有
臺諫彈劾在焉從之十一月九日臣僚言臺諫風聞于
千萬里之外日省月察時有彈擊向之論及縣令則守
臣自青論及守臣則監司引咎今諸路監司偃然坐視

不得翫法慢令之守置而不問罷輟不任職很愎不事
事貪刻以害吾民者悉縱之而不察竊長厚之名以成
萎靡之俗乞今後臺諫或論及所部守臣通及三名許
御史覺察將本路監司量行責罰從之 三年三月二
十四日臣僚言數年以來州郡監司交承之後具申錢
物前後不同或有中間朝廷而不與之明別是非或有
私白臺諫而無從究見曲直其弊皆起于不候交割先
次離任之故甚者貪夫資之以席卷姦吏乘此以並沿
隱匿寔名竄易文歷歲月侵奪漫不可考其間弊倖殆
不止此合符告新古人所貴乞自今後監司郡守到罷
雖被召命並候親相交割錢物即須同衙中上方許離

任或以故去或以罷斥亦令佐貳屬官將見在錢物明
著項目列狀交管結罪具申朝廷從之二十七日臣僚
言選任監司多自三丞二著及遺寺監丞中拔擢而用
之近歲以來獻議者必拘以曾任州郡方許持節夫監
司之才固不可以多得今有其才者既以未任州郡而
不預選曾任州郡者或多遲暮而乏風采是豈容拘之
以此而不加廣耶乞自今監司除嘗為知州軍許選差
外其三丞二著雖未為知州軍而曾任知縣者若堪充
是選則並許通差其未為知縣者雖歷三丞二著勿差
如舊從之嘉定三年五月二十六日臣僚言乞申徹
中外俾膺監司之任者每歲各季輪流巡按管下州縣

稽察官吏疏列臧否訪求民瘼具以實聞雖窮荒僻左之地尤當博采情偽所過州縣各差三十人祇應迎送不許赴宴會受饋遺從之 四年二月五日監察御史

商飛卿言監司所統一路吏治短長耳目易及願乃竊賢厚之名以自蓋鮮所揚激乞自今選仕監司一以孝宗之已行為法不必拘三丞二著之制倘其人委有風望曾經作邑雖寺監丞亦許選差仍乞令侍從兩省以上官各舉所知保奏以聞有不如所舉并行責罰從之 九年二月三日臣僚言今之監司或掌刑獄或重鈞運茶鹽倉庾各有攸司大率以廉察為職教畫一放觀聽攸繫好惡雖微舒慘立見由中朝百執而視外一監

司若未足深加之意然列城十邑之休戚實關係乎一臺之正否委任一非其才喜怒不得其中則九重雖有如天之澤亦將壅閉而不獲施矣今江浙諸路監司間有闕員未即差除得非謹於掄選而不以輕畀乎乞命大臣審擇中正無私剛廉不撓之士亟充監司闕人去處仍詔近臣各舉一二人以脩採擇諸路幸甚從之

十一年十月三十日臣僚言朝廷置部使者之職俾之將明王命以廉按吏治至于職事則各有攸司婚田稅賦則隸之轉運獄訟經總則隸之提刑常平茶鹽則隸之提舉兵將盜賊則隸之安撫是以事權歸一而州縣知所適從民聽不貳而詞訟得以早決而今之為監司

者依勢作威不以激濁揚清為先務而惟以追逮縣吏
為威名不以按發姦賊為己能而惟以泛受詞狀為風
采故珥華之吏凡有詞訟今日經某司則判曰云云明
日經某司則又判曰云云甲可乙否彼是此非遂致州
縣之間無所適從日遷月延終不予決是豈陛下分臺
置使之本意哉乞下臣此章戒飭諸路監司體朝廷設
官分職之意懲昔人侵官離局之非若州縣之間或暴
賦橫斂以搖民心或隱蔽水旱以欺主聽或大吏有姦
賊而姦國或兵將色藏而干紀許諸司從條吏互察外
自餘詞訴須委自發廳契勘果隸本司方與受理若未
經州縣結絕者且與立限催斷給與斷由聽詞人次第

理訴並不許他司越職干與及有追索入案庶幾州縣之吏可以一意奉行閭里之民不為豪強所困從之十二年十月五日臣僚言竊惟國家設官分職內外錯立激揚所繫舉刺並行詳內畧外固非分治本意而有舉無利任按察者可不究心乎蓋人主深居九重人才賢否不能徧察故內而彈擊則責之御史外而按刺則責之監司比年以來臺臣奏劾無月無之而監司郡守各不舉職夫有舉必有刺二者宜兼行之今也連連累牘紛紛來上或舉政績或舉所知或舉廉吏或舉科目有獨銜而特薦者有連銜而列薦者有一狀而薦至五六人者每至將替尤為猥衆其間固有時取姦賊廉

按一二然類多吐剛茹柔莫肯任怨至有終歲而不按
一人終仕而不劾一吏者豈部內官吏皆賢而無可論
者耶上下相蒙孰視不問雖言責之地得其風聞不敢
絀然而外臺容庇漏網竒多乞戒飭監司各察其屬舉
賢糾惡叅舉並行仍令省部每遇刺舉來上或舉多刺
少或舉少刺多並置稽稽考畧倣臺臣月劾之例少加
旌別如有任滿不按一吏終歲不劾一人者並令臺臣
覺察重與責罰庶幾官曹肅清姦貪知畏從之 十四
年六月三日臣僚言天子耳目寄與臺諫而臺之為制
則有內臺有外臺外臺即監司是也今之內臺非已經
作縣者不與茲選則外臺之任可輕畀之未嘗作縣者

乎且薦舉之事外臺職之按刺之事外臺又職之至于
蜀乘飛輓之任犴獄平反之責倉儲斂散之權其上關
國脉下切民瘼至不輕也淳熙間臣僚奏請今後監司
非曾厯知縣者不可輕畀亦謂其糾察郡縣觀覽風俗
厯任頗重難以付諸未嘗更厯民事者也欲望聖慈中
明舊制應凡監司並照內臺體例必曾作縣有聲者然
後除授則由內外皆可得人而于耳目之寄不為無補
從之閏十二月一日臣僚言竊覩慶厯中富弼上言之
令中書密院通選諸路轉運使副令逐路轉運選轄下
知州逐州選部內知縣縣令于是薦張溫之九人以備
選擇又觀嘉祐中陳升之嘗言郡縣之得失固不得周

知付之十八路轉運使遂上選用責任考課之法二臣之言可謂切中時病今之監司鮮能任責謂薦賢可以市恩謂按吏足以召怨或終一任而被旗擢者多至數十經按劾者間有一二豈所部多賢而無可按之吏耶臣嘗考之矣其說有四雅無譽望則有所隱蔽而不欲言素乏廉隅則有所縱弛而不復言暱于親故則有所掩覆而不容言迫于勢要則有所顧忌而不敢言是以州縣之吏善惡不分功過莫辨朝廷有寬大之詔而吏弗宣守宰無循良之政而民愈困夫監司號外臺耳目職業不修迺至若是豈不負陛下委寄哉邇者近向守令罪狀顯露人所共知臺臣已行彈奏矣監司方從而

按發不幾於失職乎州郡守倖贓證明白見于互申諫
臣已行論列矣監司乃為之回護不幾於忠姦乎上下
相師習以成風無恠乎吏不稱職而民不得安其業也
夫有官必有課其來尚矣上自州縣長官下至一命之
吏皆有長以考察其能否獨監司無所屬而莫為之長
其賢不肖當使誰課之漢法御史中丞外督部刺史本
朝蘇洵亦欲朝臣議定職司考課之法於御史臺別立
考課之司中丞舉其大綱擇屬官強明者專掌其事以
舉刺多者為上以舉刺少者為中以無所舉刺者為下
臣謂舉賢人之所樂按吏人之所難故歲舉率有定員
而終歲或不能按一吏今莫若參用本臺月課之制委

自御史考察諸路監司相視按刺多寡而定其高下歲終以名聞于朝而行賞罰焉庶使監司皆知自勉而不至曠職州縣有所畏憚而不敢為非民生庶乎有瘳矣欽望睿旨宣諭大臣特賜施行從之